

E YANA KANI KA ME TAMINEMETEMONE AMAKE.

As Primeiras Pessoas

ABARAO ME TAMINEMETEMONE AMAKE.

Abraão e Sua Família

Língua Jarawara

E YANI KANI KA ME TAMINEMETEMONE AMAKE.

As Primeiras Pessoas

Língua Jarawara




**Sociedade Bíblica
do Brasil**

Os desenhos usados neste livro foram gentilmente cedidos por:

© **David C. Cook Publishing Co.**

Edição Digital
Revista 2015

Composto pela
Associação Internacional de Linguística SIL – Brasil
Anápolis – GO



Yama watari ya Teoso yama nafi hiri nematamonaka. E watarihi, wami watarihi, Teoso yama hiri nematamonaka. Wami wataremetemone amake. Faha ta nehemetemoneke baha. Wami tohehemetemoneke faha bofe ya. Yama wehe wataremetemone amake, mata. Yama nafi sosoki tohehemetemone amake. Teoso kanamori yoyobi tohehimatamonaka, faha neme ya, yama soki ya. Teoso ati yana nematamonaka.

"Yama wehe nawahabanake," Teoso ati nematamonaka.

Yama wehe nawemetemoneke, waha, Teoso ati ehene.

"Yama wehe hiri onaha amosake," Teoso ati nematamonaka.


Yama wehe Teoso hiri hinehemetemoneke, yama wehe kanawanitebanihi.




Yama wehe one ya Teoso neme hiri tasehimatamonaka. Neme sabiteba Teoso kobobo ni nematamonaka, neme hiri nari.

Yama wehe one ya Teoso faha ebe kanehimatamonaka, wamiteba tasi tobone karo, ma baikani ya. Teoso faha yoro tokaniwame ya wamiteba tasi tonehemetemone amake fahi. Wamiteba tasi toni ya manakobisa awa yanehemetemone amake fahi, Teoso ati ehene.

"Wami hiri onaha ya awa yanaha amosake," Teoso ati nematamonaka.





Yama wehe one ya Teoso bahi hiri nematamonaka, yama wa toni kabonaha. Manakobisa abariko hiri tasehimatamonaka, abariko yama soki kabonaha. Teoso abariko hiri ne amowa mera hiri, nematamonaka, yama soki ka mebone mati.

Yama wehe one ya Teoso ati yana nematamonaka. Ati e nematamonaka ahi. "Faha abe hine namohaba amake. Neme abe yana tonahaba amake, bani mati. Bani hine me namohaba me amake," Teoso ati nematamonaka.

Teoso ati ehene aba me ya bani me tabaha me yanehemetemoneke.

"Aba me hiri onaha me ya bani me hiri ni tabaha me hiri ni amosake," Teoso ati nematamonaka.

"Aba me tama, bani me tama, tehaba me amake," Teoso ati nematamonaka.





Yama wehe one ya bani mebone Teoso mera hiri nematamonaka, yama kabani abebonehe. Teoso bani me nawatabone mera hiri, nematamonaka.

"Bani yama kabani ka mebone me hiri onaha bani tabora ka mebone me hiri onaha bani me hiri ni amosake," Teoso ati nematamonaka.

Manakobisa eteba Teoso hiri nematamona amaka. E yana kani maki tohehimatamonaka, Teoso hiri hinahari. E yana kani kamatamona Atao tohaka.

Atao hiri ni yati taborobona Teoso hiri hinehimatamonaka. Taboro amosematamonaka, Teoso ehene. Taboro inomatamona Etehi tohineke. Yama koro na tamehemetemoneke, Atao hikawinahabonehe. Teoso Atao nawinematamonaka, Atao taborobonaha ya.



"Awa boni tikababa amake haro, awa boni nafi. Awa boni ohariha tikabarahabana tike. Awa boni ohariha tikabi ya tihababa ama tike," Teoso ati nematamonaka.

E ka amiteba Teoso hiri hinehemetemoneke. Yana kani fana tohehemetemoneke. Inimetemone Efa tohineke. Teoso yama hiri ni hawa tohehimatamonaka fahi. E ye kahariha oharimaki ya Teoso yama ahi nematamonaka. Yama ahi ni ahabe yama wehe one ya hasi nematamonaka.

Yama wehe one ya Efa ati yana nemetemoneke, Atao ya famaharo.



Efa awa boni awakabote na tohehemetemoneke. "Awa boni kabi amosamone onofa amani," Efa ati boti aati tohehemetemoneke. Efa tokehemetemoneke, awa boni awahabonehe, ohariaro. Wehemetemoneke, awa beheri ya awa boni kakatomaharo.



Efa awa boni kakatomaha, waha maka awehemetemoneke, maka Satanaisi tohaharo, hinamati me ka yama. Maka ati yana nemetemoneke. "Awa boni yome tini ya yama tiwatohabana tike," maka ati nemetemoneke, Efa keyeharo.



Awa boni kabarabone Teoso ati nemonaka. Awa boni totomi onahabanake. Ohabarahaba owa awine oke. Yama owatohaba owa awine oke.



Awa boni yome ni amosake. Atao tikama, mata.



Atao awa boni totomi tinahi. Awa boni isi ni yome tini ya tihabarahaba tiwa awine tike.

Awa boni amosakeni.



Awa boni me totomi na me ati boti yama kamina me watomisehemetemoneke, me ihi hiyara mati.

Himata nima e ehene ribe?

Tikamahi. E kawahiyibeya.



Teoso kobo nake ati yana nematamonaka, Atao mera aate nebanoho. "Awa boni te kabarinihi, te kabarabone onaharo?" Teoso ati nematamonaka.

Efa owa kakawarake, awa boni ya, ati ihi totomi onahabonehe.

Maka ati ihi awa boni yome onahara oke.



"Awa boni te yome rabone onaha owati te mitarani te awine? Te watamarahaba teke ahi, owati ihi. Te towakaba teke, yama bara ya. Yama bara ka awa boni tamara fatara te koro nawahaba teke, te tefebana," Teoso ati nematamonaka.



Efa yama aawa tinahi. Yimawa ehobote waha tiwaha, yifo hiri ni karo. Teoso ati ehene e towakiyomamarabone Teoso ati nareka.

Himata nima e ribe waha? Hibaka ya e towakaribe?



E taborobone
Teoso hiri hinaha
amosamaroke. Tabora haha
hiyakere. Tabora taiti
amosamaro amake
owa ni ya.



Ee, yama hiyara e hiri
namaro e amake. E ka
matehe e
kanawanahaba eke,
yama amosa me hiri
nawahatehaba mati.

Atao biti taiti inomatamona amaka, Kai. Kai kotematamona amaka, Abeo. Atao biti mera kanawanehimatamonaka, Teoso ati tamine me watohabone mati.

Teoso yama nafi hiri
nematamonaka.

Ofeya onofa oke hari,
Teoso ta hinahari.



Himata yama ta oribe, Teoso ni ya?

Ofeya tinabowahabana tike, ta tinahabana, Teoso ni ya.



Abeo nanafi toharematamonaka, mata. Manakobisa nanafi nawahe ofeya nabowe tana hiri ne ofeya tabasi nawahe ofeya nahatimatamonaka. Kai nisori kakatomehimatamonaka, ofeya nahatihari. Kai ati boti yama kaminematamonaka.



Ofeya ta orahaboneke, Teoso ni ya. Fatare ka yamata ta onahabone oke, ha owa.

Teoso Abeo ka ofeya nofehimatamonaka. Kai ka yama nofarematamonaka. Kai ka yama Teoso hinofaraha yawehimatamonaka, Teoso kakohibanoho.



Teoso hiyakara. Teoso onofa okere.



Teoso oko yama nofare okaniso onahabihabana oke.



Abeo oharika. Abeo ohari onahabihabana oke.



Owakomeha oke waha. Abeo onabowe nabowi me hiware awaka.

Kai nisori nahabihimatamonaka, me hiwarari. Kai ati boti yama nima nematamonaka. "Okaniso onabowahi nabowi Teoso awe awaka," Kai ati nematamonaka, ati boti yama kaminari.



Kai Teoso ati mitehimatamonaka, neme kari. Teoso ati yana nematamonaka. "Abeo era?" Teoso ati nematamonaka.

Faya Kai watomisehimatamonaka. Teoso ati yana nematamonaka. "Abeo manakone ta tinahabana tike, tinahabihari. Owati ihi yaka tinahabana tike. Tiwinarahabana tike. Fara yama wehe nima tika bani nabana tike, niso tinahabiha tiwa," Teoso ati nematamonaka, Kai narabo nima nari.



Abeo owato okere. Abeo bati ama okere.

Teoso Abeo nabowi awe awaka.



Okitarahaba ama oke.

Faya Kai tokawehimatamonaka, tabora bara ya. Faya kobo towitimatamonaka, tabora one ya. Tabora inimetemone amake, Nohoti. Atao ya Efa me famaha matehe me kihamarehemetemoneke waha.

E ka matehe watamarahaba e amake. E ka inamatewe owa nahabi, owa yama bara ya tokahi, matehe e kihamarahaba e amake.

E ka matehe watamaraha hima, Teoso e aate nibeya, e ka mateheba ta nebana. Teoso amosate amaka. Yahahi e ka mateheba ta nebanaka.



Faya Atao fati nabati weye namatasa faya biti watatasehimatamonaka.

Okatao ino amaka, Iseti.

Okatao okanawanabana oke tasa, yama amosa hiri nebana.



Iseti yanawehimatamonaka. Faya Teoso ya fafamawa tohehimatamonaka, Teoso hikanawanebonaha, yama amosa hiri nebonaha.

Iseti ka noti me ta me ihi hiyaremetemoneke. Me one yama boti me one ihi iti me one keye hiri na tohehemetemoneke.

Teoso me nonofama toharemetemoneke. Teoso me nofamaraha bahi ta me nonofa tohehemetemoneke. Abariko me nofa, na tohehemetemoneke. Amowa me me nofa, na tohehemetemoneke.



"Yama aate ni e nofamakere, Teoso ka yama. Bahi ka yama ta e aate naba eke. Abariko ka yama toha, amowa me ka yama toha, nabanake," me ati nemetemoneke.




Yati me hiri na me ka yati hiri ni me aate, na tohehemetemoneke. Awa me hiri na me ka awa hiri ni me aate, na tohehemetemoneke tasa.



Me one hiyara me ka owa ta aamosa tohehimatamonaka, ohariari. Inomatamona amaka, Nowe, Teoso famahari.

Yama te hiri na te ka yama hiri ni hiyakere. Te ka yama hiri ni hiyara Teoso te nayawaba te amake.



Nowe me ka yama hiri ni kakatome ati yana nematamonaka.




Yama hine nake faro. Yati hiri ni Teoso tohakere. Teoso yama nafi hiri nematamonaka. Yati tera kasomarahaba amake faro.

Nowe te awa ha, yama watohimona ati nari.

Nowe yama watokara.

Nowe Teoso ya fafama amaka fari, ohariari. Manakobisa Teoso ati yana nematamonaka. "Me nafi onahabihabone onahara oke, me ihi hiyara mati. Nowe kanawa ehebote hiri tinahabana tike. Faha onafowahaba ama oke," Teoso ati nematamonaka.

Nowe Teoso ati mite kanawa hiri nematamonaka, kanawa ehebote, Teoso hiyosehari. Kanawa hiri ni amo ni tatama tohehemetemoneke. Me one Nowe haha kanehemetemoneke.



Himataba amari, kanawa? Faha watakere ahi.

Kanawa wami ya yaka naba toha awineke.

Nowe ka kanawa hiri ni hawa tohe ya bani mera towakamehimatamonaka, kanawa tori ya, me ahabarahabone mati, Teoso ati ehene.





Nowe rabike awaka.

Kanawa hiri ni amo ni tamaha Nowe hiri naka. Himataba kanawa amari, faha watari karo?



Faha fowahaba ama?

Faha fowaraba amake. Nowe keye hiri ne awaka.



Nowe me tokiyomehemetemoneke, kanawa tori ya, Teoso ati ehene. Faya faha kaki kanawanehemetemoneke.

Himata amari?

Teoso ati ehene amare?

Faha kaki nafiraba amake. Faha fowaraba amake.

Faha kaki nafihaba amake.




Faha kaki fafawa toharemetemoneke. Fara yama wehe nima faha kaki, na tohehemetemoneke. Yama soki ya kake naba, na tohehemetemoneke. Abariko ohari kote ya faha kaki fawa nemetemoneke.



Faha kimisemetemoneke. Yati si toni nemeha faha fowe ihi fawa kanisemetemoneke.

Faha fowe ihi me nafi ahabemetemoneke. Bani bofe ka me ahaba, nemetemoneke. Bani biti me ahaba, nemetemoneke, me tabori watamara mati, faha fowe ihi. Nowe ta hasi nematamonaka, kanawa kihahari. Nowe fati toha, Nowe biti me toha, Nowe biti me ka yibote toharawa, bani me toha, nemetemoneke, kanawa tori ya.




Faha sai yana tonehemetemoneke, waha. Kanawa forehemetemoneke, yati nemeha mese ya.



Amo ni tamama ne ya bani biti sa tosatasehimatamonaka. Bani taborobona wasihi kamawarematamonaka.

Nowe kanawa tori ya foye abariko nanatama tohehimatamonaka. Faha saiha ka wami hokowaha Nowe awe tasi tonehimatamonaka. Nowe tasi tone tasi toni oharirematamonaka. Me nafi tasisi nemetemoneke. Bani me fitoto nemetemoneke.





E yaka na amosate amake, wami ya. E yaka namatasakibone.

Bahi hiwene hiwa ni amosaka.

Me nafi ahabawaharake, Teoso ati ehene, me ihi hiyara mati. Ha e ta Teoso ati e nofaha yama amosa e hiri nawahatehaba e amake. E ka matehe e kanawanahaba eke, yama amosa me hiri tehaba mati.

Nowe tana hiri name bani mera tabasi ne bani mera ta nematamonaka, Teoso ni ya. Nowe yayai nematamonaka, Teoso hasi hinihari. Manakobisa bani mera ta nematamonaka Teoso ni ya.





Nowe bote toharise ahabematamonaka, bote tohahari. Nowe biti me tokahiwawawitimetemone ka me totamemetemoneke. Me nafi wiwina tohehemetemoneke, fara me ati me hiri na mati, tabora ehebotebone me hiri na mati.

Faya yobe me hiri nawahemetemoneke, yobe nemehabotebonaha. Yobe neme towasimisebona me ati nemetemoneke.



E kobo tomisaba e amake, neme ya.

Era e kahiyarake, yama e watoha e.





Hahi yobe amosate amaka. Neme ya kobo tomiseba awaka.

Yobe nemehareka. Era e kahiyaraba e amake.

Teoso yobe hinofarehimatamona amaka hari, nemehari. "Hahi yobe me hawa tonihi ya owa me wati nawateraba ama oke. Me ati okanawanabone oke, me ati tamawatehabone mati, me ati onihawahatebone owa. Manakobisa me ati totami ya yobe hiri ni fawa nebanaka, me wina nawaharetehaba mati," Teoso ati nematamonaka.

Faya Teoso me ati tonahiyematamonaka, me abe ebe nabone mati. Me one ati hiyaya, me one ati hiyaya, me one ati hiyaya, me abe ati watoremtemoneke.

Yobe hiri ni fawa nematamonaka, me abe ati watora me ihi. Me tokarikosa me wina nawaharemetemoneke. Yobe ahabematamonaka, yobe nemehari. Me wina nawahareha tabora ehebote me hiri nemetemoneke, fotaharo. Me tototama tohehemetemoneke, matehe me hiri nawa tohiti karo.



Himata amari? Tiwati owato okere.



ABARAO ME TAMINEMETEMONE AMAKE.

Abraão e Sua Família

Abarao taboro inomatamona amaka, Oho, Abarao yanamatamona karo. Abarao bati inomatamona Terahi tohaka. Abarao fati ini Sara tohehemetemoneke. Abarao nisori me famehemetemoneke. Abarao nisori inomatamona amaka, Nao. Nao nisori inomatamona amaka, Ara.

Abarao yama kakatome wahira Sara awehemetemoneke. Abaraora Sara haha nemetemoneke.



Abarao himata wati tiwaha?

Sara e banahabone okobi ati nareka. E tokahabone eke, tabora bara ya.




Teoso era kakatomehiba amaka.

Ara ahabematamonaka. Biti tosawikosematamonaka. Inomatamona amaka, Ro. Terahi me yana tonehemetemoneke. Terahi Ro aate nematamonaka.



E tabahaba eke, e tokoma e, tabora bara ya. Abise Abarao sawi, abise Nao sawi, nebanaka.



Terahi me ma towitiemetemoneke Hefarati tati ya. Hefarati tati ya tabora Ara tohi ya me kobo na me winawehemetemoneke.

Terahi ahabawahematamonaka tabora Ara ya. Abarao bati ahabe Teoso narabo nima hinehimatamonaka. Teoso ati e nematamonaka ahi.

Abarao tikahabana tike tabora bara ya. Tabora bara ya te winawatehaba teke. Te taboroteba amake, tabora bara. Te totamatehaba teke tabora bara ya, Teoso ati nematamonaka.

Abarao me yana tonehemetemoneke fahi. Faya me tokawehemetemoneke. Abarao ka me ya taba, Ro ka me ya taba, nematamonaka, me toka mati.
Me one sawirabone me me kakatomehemetemoneke fahi.

Abarao tati hiyare awaka,
tabora bara ya tokahari, tabora
awaterari. Abarao winehibona
ati nareka, tabora bara ya,
Teoso hiyosemona ati
nari.





Abarao yama yaboha nahabimatamonaka, tokahari, tabora bara ya. Yama soki one ya Abarao nanarifa me abe hiyaremetemoneke.



Yama yabosa na awine?

E awakere. Tabora bara owatera amake.

Abarao kobo nawahematamonaka, Kanaha ya. Kanaha ka me Abarao me nofahemetemoneke, me yaha mati.



Abarao kobo ne Teoso ati mitehimatamonaka. "Abarao te taborobone amake haro," ati nematamonaka. Abarao Teoso ati mite bani tabasi nematamonaka. Bani tabasi ne bani ta nematamonaka, Teoso ni ya.




Abarao me winaha me wiwina kawaharehemetemoneke, Kanaha ya. Faha kaki fotara ihi wami tohokowemetemoneke. Wami tohokoha ihi masiri yani yokana toharemetemoneke, waha. Faya riyao fimihi ofeya mera wati kanehimatamonaka.

Abarao nanarifa riyao bani mera wati kanehino awehimatamonaka.



Abarao nanarifa riyao me itehemetemoneke.

Bani me te towakamahi hike ya.



Riyao me fifimi tohehemetemoneke, me tafe watara mati. Faya Ro Abarao narabo nima nematamonaka.

Abarao masiri yanamakere, waha. Masiri waya nisake. Me tafe watamakiribone, waha. Riyao me fimiha bani me me waka nawahakibone, waha. Himata nima e ehene nawaharibe, waha?

Hima e banahi. E tokahaba eke, Esito me tabori ya. Esito me tabori ka masiri na awineke, bani me hikababana. Faha kakematasi ya Kanaha ya e kamatasaba eke.



Me yana totasemetemoneke.

Abarao himata wati tiwahine tiriya?

Sara titamina tike. Titaminaha e toki ya Esito me tabori ya e kobo towiti ya owa tiyokohaba ama tike, owati boti ati nineke. Tiwa me itiwatehaba me amake. E kobo ni ya owati tai onihabana oke, tiwa okomina owa. Okasima amake, onahabana oke, owa me nahabiraba owa, me okeyeha owa.

Faya me kobo towitiemetemoneke, Esito me tabori ya. Faya me winawehemetemoneke, Esito me tabori ya. Esito ka me Sara me awehemetemoneke.

Aii. Bara amosake.

Hibaka ama tiri? Abarao hinakasima ama oke.

Tekamahi, towisawa hiwahabana. Amosi towisawa hiwi ya hitihaba amake. Hinofi ya hiti ya manakone ta hinahaba amake Abarao ni ya. Manakone towisawa hinahabihaba amake, manakone nafiharo, amosi karo.

Amosake, Abarao. Tika ahabi onofa okere.



Abarao owamateraba ama oke.

Sara towakame Sara kobo tokanamehimatamonaka, towisawa taboro ya.

Towisawa Abarao hinakasimamone awahi yayai nematamonaka, Sara amosi ihi.

Sara tiwa onofa oke, kasiro ya. Sara bani me ta onahabana oke, ayomona ni ya, bani me yoro tokana mati. Ofeya me toha, bowi toharawa, asometo me toha, nabanake.

Himata nima owahaba ama ori? Towisawa onofa okere. Oko yibote nabisaka.



Towisawa Sara itihibona komene towatematamonaka. Teoso ati eheneno towisawa komene towatematamonaka, Sara maki nahari.

Faya towisawa me ka owa ati mite yawehimatamonaka.

Towisawa yama tiwatoha tiwa awine ti? Haha bara titihabone maki nehimonaka. Abarao fatimoneke. Abarao fatimone titihabone ihi kiya tine tike.

Abarao te kakamahi, aate onehibana.





Abarao owa tikeyehani tike. Himata ebe tinaha owa tikeyerini? Abarao tika yibote tekamahi, titaboro ya.



Sara hima. E tokomatasahaba eke, Kanaha ya. Towisawa era toyoseme eke.

Ee, hima. E tokomaba eke. Faha kakemi ka masiri yanama awineke, Kanaha karo.



Faya Abarao wete namehimatamonaka, Kanaha ya, tasa. Nisori biti Ro tohehi ya famehimatamonaka. Abarao bani me kiha, Ro bani me kiha, nematamonaka, bisa. Bani me me nawatikimaha me ka bani me tami ka masiri me kahiyararaba me amake. Ro nanarifa me ya Abarao nanarifa me taba me abe kakowemetemoneke.

Ro ka bani me tabori amake haro.

Abarao ka bani me taboribisa amake haro.

Abarao me ati mitehimatamonaka, me abe hora na mati.


Sara Ro kako onofa okere. Ro onofate amaka.

Ro tiwa abise te amaka.



Yama we one ya Abarao Ro ha nematamonaka.

Ro tikama ahi, tiwa aate obeya.



Himataba Abarao tokamisara, yati ya, neme ya?

Ro tika kako onofa okere. E winikimawahaba eke. Tabora tinofa yofi tikanabana tike.

Okahabana oke, sitati Sotoma ya. Sotoma beheri ka masiri tamatebisa amake, oko bani me tafebisabana.



Ro toke nowati ya Abarao Teoso aate nematamonaka. "Abarao yama nafi ki tiwahare. Tikanoti me taboriteba ta onahabana oke, tabora nafiharo, tikanoti me winatiba karo. Me winatehaba me amake ahi," Teoso ati nematamonaka.



Abarao Ro kemeyerehimatamonaka. Abarao winabisehimatamonaka, Eboro ya. Eboro ka me Abarao me hiyaremetemoneke.



Abarao tiwa ota nofake, kasiro ya. Bara me kaki ya era me mowa ni ya e tabatehaba eke, era tikasomahaba tiwa.

Ee, amosake.

Yama we one ya me ka owa kana ni kakehimatamonaka. Kobo nake Abarao tabiyo yama siba nematamonaka.



Himata ebe neno amara?

Me ka owa ahabaranoho? Noko yawa kanikimaka.



Himata yama amarini?

Yawa yama mowa narake ahi, Sotoma ya. Ro ka me yawa me hekama narake.

Ro tonakamakibona Abarao ati nematamonaka.

Abarao nanarifa mera
hima nematamonaka,
yawa me
tonakamakihabone
mati.

Hima, Abarao era ati ka.

Hima, Ro e siba nibeya.



Te nahohaba teke,
oko yama te
kakatamahabone te.
Oko yibote ita,
nineke haro.

Ee, ota
nahohaba
otake.



Eboro ka me sawihemetemoneke. Abarao
ya me tabehemetemoneke, yawa me
tonakamakiha mati.



Ro yawa hekame yawa hekamarematamonaka. Yawa hikawehimatamonaka, hawi ya. Abarao yawa me towasimakiemetemoneke. Abarao yawa tabori ki nematamonaka, Ro sawi tabiyo.

Haha yama bari kani waha ya Ro sawihimona onahara oke.

Me e bata kanahaba eke, yama soki ya.



Abarao yawa me mowa hinaha me tokomemetemoneke. Faya Ro Abarao me me wasiwama Abarao me me hiyaremetemoneke, waha.



Abarao afa ama ti?

Abarao otara te kasoma teke.

Teoso ati ehene amaka, e nafi kasomari.



Abarao me tokoma me me awaha me yayai nemetemoneke, Abarao me me hikasoma mati. Sara ta yayai remetemoneke.



Abarao Sara awehimatamonaka.

Sara himata ihi yayai tirine tiri?

Abarao yawa tinakamakiha tiwa nanarifa owa me kakatomahabone tinahani tike, okatao watare owa, owa kakatomehibana. Tikahiwatera ama tike. Tikatao owa kakatomehiba hiri titera ama tike.




Ee, okanoti meteba tamatehaba me amake, Teoso ati neri amaka. Okatao watakara, mata.



Abarao watamimatamonaka. Watamihi Teoso hihiyarematamonaka, wata ya.



Abarao
 watamimatamonaka.
 Watamihi Teoso
 hihiyarematamonaka, wata
 ya. Teoso ati yana
 nematamonaka. Abarao,
 amowa me tiwa ha. Amowa
 me tomi tikanahi. Amowa
 me tomi kani tiwato tikere,
 me tama mati. Abarao owati
 tikamitamatahi, mata.
 Tikanoti meteba me e
 tehaba me amake ahi,
 amowa me nima, Teoso ati
 nematamonaka, wata ya.



Yama we one ya Sara Abarao
 hiyaremetemoneke.

Abarao okataoba
 onofa oke. Abarao
 owa nanarifa Aka
 tohaha
 tikanahiwabana
 tike, okataoba hiri
 nabana.

Ee, amosake.
 Inamatewe
 tinawataraba
 ama tike, bote
 tiharisa tiwa.



Aka nabati weye nemetemoneke, Abarao ehene. Biti
 naihemetemoneke. Inomatamona amaka, Yisimayeo. Abarao
 Yisimayeo nonofa tohehimatamonaka.

Okatao amosaka
 hari.

Aka, Yisimayeo okataobisa
 amaka.



Yisimayeo yanawehimatamonaka. Aka biti kakahiyara tohehemetemoneke, amosari.



Sara okatao tiwa ha.
Tikatao ta watakara.

Owa nanarifa
onofamarabana
oke.

Abarao ati boti yama kaminematamonaka. "Himata hiri owahaba ama ori? Sara me abe nofamakere," ati boti ati nematamonaka.



Yama we one ya bara me fotokiemetemoneke. Me fama me ka owa ohari nematamonaka. Abarao me ha hinehemetemoneke, me tafahabone mati, Abarao ka yobe ya.



Me tafaha me ka owa ohari Abarao hiyarematamonaka. Hiyari Sara hikamitehimatamonaka, Sara wahiyaro, yobe bari ya.

Abarao Sara biti nawaheba amaka.

Inamatewe onawatateraba ama oke, bote ohawai karo.



Aka bare hiyari mitaha yama wati nawahemetemoneke.

Sara biti ne ya himata nima Yisimayeo nawaharaba?



Me tafi hawa tohaha me yana tona me tokawahemetemoneke. Abarao ya me totabamehemetemoneke, Abarao wete namehibanoho. Bare Abarao hiyaratasehimatamonaka, bare Teoso tohehinoho.

Abarao Sotoma ka me tamine omitara oke, me ihi hiyara mati. Sotoma ka yama sari okanabone owati boti ati ke.

See, Sotoma Ro me tabori amake.



Abarao Teoso narabo nima nematamonaka, Teoso Sotoma sari karehibonaha. "Sotoma ka me e ye kafami nima me na me ihi amosa me owasi ya Sotoma sari okarabone oke. Me ihi hiyari ya Sotoma sari okanabanaka," Teoso ati nematamonaka.



Bara me one towakamakihemetemoneke, Sotoma ya, Teoso ya tataba mati. Ro me kobo hinehemetemoneke, Teoso nanarifa mati.



Te kakamakehi, te amo kibeya, oko yobe ya.



Kiki. Bara me kakiha me te awaha, Ro me hekama mati.

Ro mera towakamehiba amaka, hinaka yobe ya, me amo kanahaba mati.

Hima, Ro e aate nahi, mera kakibana, e ni ya, me e yori naba mati.



Sotoma ka me kake nabemetemoneke, Ro me aate nabone mati.

Ro me tikayosemahi, me kakamaba mati.

E awakere. Me te ahi rabone teke.



Tika nokobi ota waka naba otake.



Nokobi te naha kanahi.

Hima me e watahi.

Ro hiyari kawē bara me te na me Ro me nakiyomamake Ro mano me wara tona Ro me towakiyomamehemetemoneke.

Nokobi me naha kanehenemetemoneke.

Sotoma ka me nahofara me yawehemetemoneke, Ro me hikasawariha mati, Ro bara mera kayawari.

Hima, nokobi e naha kanahi.



Sotoma ka me nahokosa me me noki karabikehemetemoneke, bara me ati ihi.

Onoko awamakere.

Onoko refo tonake.




Yobe toro ya me kibe me

Ro te banahi. Te tokomahi. Yama sari kanahaboneke, Teoso ati ehene.

Oko bitimi me toha naboneke.





Ro ati me
kasawarihemetemoneke, Ro
ka bitimi mati. Ro me haha
kanehemetemoneke. Ro ya
me totabami
nofaremetemoneke. Faya
yama wamini ya bara Ro me
me
towakamehemetemoneke.
Ro toha, Ro fati toha, Ro bite
famarawa nemetemoneke.
Ro bane nowati ya Sotoma
hatihemetemoneke.

Tabora te
awawamariya.

Okomabone
onahara oke.

Ro fati ki nawahamaha tabora
awawama fara wai ya
tokitemetemoneke, saha tohaharo.
Ahabemetemoneke.



Yama we one ya yati waha ya Abarao
tokomisehimatamonaka, Sotoma ka yama
aawa nebonaha. Yama hatisa nemetemoneke.
Awa hasawiri nafisa nemetemoneke.

Sotoma ka Teoso mera sari
kane awaka, Teoso ati me
kasawariha mati, me ihi
hiyara mati.



Sara biti watawehimatamonaka. Inomatamona amaka, Isaki. Isaki tohehimatamonaka.



Isaki yaka nawahe mati yowari fawi fawa ne Abarao marina hiri nawahematamonaka. Yisimayeo marina ya sawi Isaki kasawarihimatamonaka.

Isaki yama tahi tohatereba amaka.

Tinohoti ati fawa nahi.

Sara okatao kakoha awineke.



Abarao okatao Aka biti kasawarihareka. Aka me tikayosemabana tike. Me onofa okere.



Abarao Sara ati wati nawahe ati boti yama nima nematamonaka. Abarao ati boti yama nima ne Teoso ati yana nematamonaka, Abarao ni ya. "Abarao Aka biti ya famaha me tikayosemabana tike. Me owakatombana oke, ha owa," Teoso ati nematamonaka.



Manakobisa yama waminatasi ya Abarao mera tokayosemematamonaka.



Aka Sara tera nofamaraharake. Te towakamahabone teke. Teoso tera kakatomehibonaka.

Faya me towakamehemetemoneke. Bahi hiwene ehene faha wataremetemoneke. Aka faha wati nawahemetemoneke.



Okofaha ahabakibone, faha wiye karo.

Faya Aka ka faha ahabawahemetemoneke.



Bakasi ihi ohababa ama oke.


Ohababisaba ama oke, bakasi ihi. Tihoma ahi. Yama bafo amake haro.

Okatao ahabe ya okatao ahabi awi onofarahaba ama oke.



Aka ohi nemetemoneke.

Aka tokehemetemoneke, hike ya, biti ahabi awarabonehe. Teoso ati yana nematamonaka. "Aka, tikatao ya te fama nawi nahi. Te ka fahaba ta onahabana oke. Tera owakatoma oke," Teoso ati nematamonaka.



Aka biti ya famamatasehemetemoneke.



Aka faha kimisani awehemetemoneke, ayata ya.

Faha ama nanihi. E ahabarahaba e awineke. Teoso era kasomaka, faha ta nari.



Aka faha kabi kanehemetemoneke, biti nafawabonehe.



Aka me taboribone me hiri nawahemetemoneke, biti ya famaharo. Faya me watawehemetemoneke, tabora me hiwasiha ya. Yisimayeo yayanawa tohe manakobisa towisawa tohawe himatamonaka.



Abarao biti oohari tohehimatamonaka, waha, Isaki tohahari. Isaki yetene tohamisawe Teoso ati yana nematamonaka. "Abarao tikatao tinabowahabana tike, tabasi tinehibana, ta tinehibonaha owa ni ya," Teoso ati nematamonaka. Abarao biti hima nematamonaka, Isaki.



Himata Abarao ebe raba?

Abarao bani tabasi neba tohe awaka, Teoso ka baniba ta nebana.

Faya Abarao me towakemetemoneke.

Abarao me towakimisemetemoneke, yati ya.



Isaki ati boti yama nima nematamonaka.

Himataba okobi owa towakamaraba?



Me ma tokowite me teme nemetemoneke.
Faya tana me hiri nemetemoneke.


Abi yifo amake haro.
Bani e tabasi neba
hika tohara?

Teoso e ka
baniba ta neba
e awineke, e
tabasi nebana.



Abarao biti matohimatamonaka.

Abi himata nima
tiwehene
nibanari?



Teoso okatao ta ni
owa tinofi ya okatao ta
onahabana oke, tiwa
ni ya.

Abarao biti ibarimatamonaka,
yifo mese ya, tabasi
hinehibonaha, ta hinehibonaha
Teoso ni ya.

Abarao yimawa tama nematamonaka, biti itehibonaha, yimawa ya. Teoso ati yana nematamonaka. Teoso ati yana ne ati e nematamonaka ahi. "Abarao tikatao tinahabihariyahi. Owati timitate ama tike. Owati tikasawaritera ama tike, tikatao tinahabihabone tina tiwa," Teoso ati nematamonaka.



Faya Abarao ofeya awehimatamonaka ayata ya.

Faya Abarao Isaki tisehimatamonaka. Isaki taboro ya ofeya ibariwahematamonaka.

Ofeya tiwa ha. Teoso ofeya ta hina amake, e tabasi nabonehe.

Abi Teoso ni ya owa ta tina manakobisa Teoso owa ta nawahamaka, tiwa ni ya.

Ee, Teoso yahate amaka.



Teoso ati yana nematamonaka. "Abarao owati tikasawaritera ama tike. Oyahatehaba ama oke, tiwa ni ya, Teoso ati nematamonaka. Tikanoti meteba me tamatehaba me amake."



Manakobisa me wete kanamemetemoneke, fara me tabori ya.



Fara me tabori ya Sara Isaki aate nemetemoneke.

Bese hibaka tihahani ama tiri?

Okobi owa tabasi nena oke, owa ta nebonaha Teoso ni ya. Ofeya Teoso ta hinaha owa kasomara oke.



Isaki horawahe ya Sara ati fawa nemetemoneke, bote tohi karo.



Sara ahaba ihi Abarao ohi nematamonaka, yawahari.



Sara abohi Abarao ibehimatamonaka, yati hoti ya. Me nafi ati boti ohi nemetemoneke, Sara ahaba ihi. Me ka one Isaki yaka neno awehemetemoneke.

Isaki himata ebe raba?

Isaki toke awaka, mati wati nawahari, ohi nebana.




Yama we one ya Abarao nanarifa owa ha nematamonaka, narabo nima hinehibonaha.

Bote ohawa oke. Ahabinima oni ya okatao fatiba hike ta raba? Ara ya tikami ya, Nao ka me aate tisami ya, okatao fatiba tekamahabana tike. Nao hinakanoti okatao hitihaba awineke.



Abarao nanarifa tokomematamonaka, Ara ya, Isaki fatibone tonakamehibonaha. Ara ya kobo toname ati boti yama nima nematamonaka.


Me tamakeni haro. Hibaka Isaki fatiba owasihaba ama ori?



Kobo tonamematamonaka Ara ya.

Abarao nanarifa kobo toname Ara ya hoti ka faha me fanawi kabi na faha me iso kanehemetemoneke.

Teoso Isaki fatibone yofi tikanabana tike, owa ni ya. Isaki fatiba oko fahaba ya owa kakawabanake. Oko kamero ka fahaba ta nabanake. Isaki fatiba owatowabanake waha.



Haha amosake. Isaki fatiba toha awineke.

Oko fahaba owa tekawahi.



Faha tifahi. Faha one onakamatasahabana oni, kamero ka fahabana.

Afa tohaha awineke.



Kamero ka fahabone ta ni hawa tohaha Abarao nanarifa ye tabi atoribone ta hinehemetemoneke. Witi atoribone ta hinehemetemoneke.



Tiwini omitibeya. Amo obana, abi ka yobe ya?

Hebeka o hate ama oni. Amo tinahaba tiwa awine tike, okobi ka yobe ya. Hibare mata.

Hebeka bati aate nemetemoneke. Hebeka anoti Rabao tohahi tokomematamonaka Abarao nanarifa ni ya, aate hinehibonaha, amo nebonaha bati ka yobe ya.

Amo tini ya amo tinahabana tike, okobi ka yobe ya. Tika kamero toharawa, nabanake.



Abarao nanarifa Abarao ati bote kaminematamonaka, Hebeka bati ni ya. Hebeka kanikebona ati nematamonaka, Hebeka bati ni ya. Abarao nisori Nao tohe biti bitemetemone amake, Hebeka.

Abarao nanarifa kawahamine faya yana tone Hebeka towakamehimatamonaka.



Teoso ati ehene okoto tekamahabana tike, Isaki fatibana.



Abarao nanarifa Hebeka me towakamehemetemoneke, Abarao taboro ya.



Yama we one ya Abarao ahabematamonaka. Abarao fati hoti ya Abarao me towakatasehemetemoneke. Yisimayeo bati ahabi tamine mite kake sawikimatamonaka.



Yisimayeo Isaki kakorematamonaka.

Ayo titaminini?

Otamina oke. Okatao me tamawate ama oke. Niso e abe mono raba eke, waha.


Teoso keye hiri tere amaka. Abarao hinakanoti me tamehemetemoneke, Yisimayeo biti mati.



Isaki biti me famehemetemoneke, bisa. Taitimatamona ino amaka, Isao. Yoto ke inomatamona amaka, Yako.

Isaki ahabe ya Isaki ka yama hibake ihawatehiba amara?

Hinaka yama Isao hihawatehaba awineke, taiti tohahari.




Isao bani me tahimatamona amaka.
Bati ka bani me isi nibone tata
tohehimatamonaka.

Isao yama yete tinaha
tika hinita kaminofara
ama tike.

Okoyo
okeyehabana
oke.

Yama wehe one ya Isao
tokatasehimatamonaka, yama yete
nebonaha.

Okoyo okeyehabana oke. Afa
yamaba amake haro.



Isao kobo name bahi toke ya Yako yamata kawari
noki nematamonaka.

Isao kobo name ma tohehimatamonaka, fimi
kome awahari.

Isao kamahari ha,
honarahi.

Ofimi oke. Otefeba
hasi tiniha.

Titefe isi niba ta onahabana oke.
Yamata manakone natehaba
amake. Okobi ka yama
tihawatehaba ta titehabana tike,
owa ni ya, okobi ahabe ya,
yamata manakonebonehe.



Isao fimihi yamata kanikawahematamonaka, Yako ni ya. Yamata manakone Isao nahabitebona ati nematamonaka, Isaki ka yama ya, Isaki ahabe ya.



Okobi ka yama tinofini? Yama ta otehabana oke.

Yama onofabana oke. Yama tiyabamakiteraba ama tike.



Yama oyabamakiraba ama oke. Hiba, otafawahamatibe

Ee, titafahi.

Okobi ka yama Isao ihawateraba amaka, waha. Okobi ahabe ya okobi ka yama ohawatehaba ama oke, ha owa ta.

Yama totoyabo kawahi ya Isaki tati wiyo nawahematamonaka. Isaki nanarifa Isaki narabo nima hinehimatamonaka, Isao ha nebonaha.



Okatao Isao tohahi ha tinahi, aate onehibana.

Isaki noko aawama toharematamonaka, bote toharisahari. Isaki towisawa tohe bote tohawe ka Isao towisawa tohawehibona Isaki ati nematamonaka.



Faya Yako bati ka bani harobona towakematamonaka bati ni ya.

Abi bani owakake oke, tiwati ihi. Tikabaho. Bani tikabi ya towisawa owa tinihibeya.

Isao bani kobo ni kekerewe tirahani tike.

Bani kobo ni kerewe orahara oke, Teoso ati ehene.


Tike owa ni ya, tiwa boboyo obeya. Isao tihaha tiwa awine tike.

Isao ati tohare awaka. Yako ati tohe awaka. Isao mano ta tohe awaka. Isao yokana ama ti?

Isao yokana ama oke.

Bani Yako hekakehi Isaki kabehimatamonaka, bani Hebeka hikawarehinoho. Isaki tafi hawa tohe Yako towisawa tonihawahematamonaka.





Nisori kakohimatamonaka.

Hebeka nanarifa Isao ati mitehemetemoneke, Yako wati kanahari. Kana ni tokomemetemoneke, Hebeka narabi nima nabonehe.

Isao Yako wati kanaharene.

Yako tinakamahi. Narabo nima tiyaho, kamehibana.




Yako tiwahiyahabone tike, Isao tiwa wati kane tiwa. Tikahi, okoyo taboro ya. Tisawi tibeya. Isao yawi fawa tehiba awani. Isao yawi fawa ne ya tiwa ha onahabana oni, tikamaba tiwa.

Ee, siba kere.



Hebeka Isaki hiyaremetemoneke.

Isaki me fanawi hiyatera amake haro, wasihabana. Yako narabo nima tinahabana tike, fatiba siba nebana, okoyo taboro ya. E ehene tima Yako ehenetehiba amaka.



Isaki nanarifa yosehimatamonaka, Yako tonakamakibonaha.



Faya Yako tokomake bati nakomehimatamonaka.



Yako ami anoti taboro ya tikahabana tike, tika yiboteba tiwasihaba tiwa.

Yako yana tonehimatamonaka

Yako tikibana? Isao yawi ahabe ya tiwa ha onahabana oke, tikamaba tiwa.



Okobi owamateraba ama oke. Okobi ahabatehiba awaka, onowati ya, bote tohahari.

Yako nowati ya bati ahabarehimatamonaka. Yako mati ta ahabemetemoneke, he nowati ya.

Faya Yako toke yama soki bata hikanematamonaka. Ma towiti amo nematamonaka, yama kabani ya.



Yama sokike. Amo onahabana oke ahi, yama kabani ya.

Yako yama kabani ya amo ne watamimatamonaka, Teoso ati ehene. Kikisama kenembote watari awehimatamonaka. Kikisama ya me one tokomisa me one kisama me watari awehimatamonaka, Teoso nanarifa mati. Teoso ware watari awehimatamonaka, kikisama tati ya, neme ya. Teoso ati watari awehimatamonaka, Teoso ati yana nari. "Ha owa ta tiwa onofa oke. Oyahatehaba ama oke, tiwa ni ya. Tiwa owakatomatehaba ama oke. Tikahabana tike, tabora one ya. Yama toyabo ya tikamatehabana tike, haha tabora ya.

Tiwinatehabana tike, haha tabora ya. Tika bitimi me winatehaba me amake ahi, ha tabora ya," Teoso ati ne ati watari Yako awehimatamonaka.



Faya Yako tafi kawahamine watari wati nawahe ati boti yama kaminematamonaka.



Haha tabora Teoso taboro tohe awaka. Neme noki bori toha awineke ahi.

Tabora inibone Yako nawatematamonaka. Tabora ini amake, Teoso Taboro, Beteo tohaharo.



Teoso owa ni ya tiyahi ya e famatehaba eke.

Yako yana tonehimatamonaka.


Faya Yako toke kokori taboro yabore ya ma towiti mera kakatomehimatamonaka.



Me ka owa Yako aate ne



Yako kobo nake Rabao awe yayai nematamonaka, hinakasima biti awahari.



Yako faha noki bori se kanehimatamonaka, bani me fehebone Hakeo kabi hinahabonehe, bani mera nafawabonehe. "Hakeo aso biti ama oke," Yako ati nematamonaka. Hakeo Yako ati mitaha kana nawahemetemoneke. Kana ni tokoma bati narabo nima nemetemoneke.

Yako sawihi abariko naharihatamonaka, Rabao toboro ya. Yako narabo Rabao nima nematamonaka.

Yako ati amosematamonaka, Rabao ni ya. Rabao ka bani mera Yako nanarifa tohehimatamonaka.



Yako owa tinarifahabana tike. Owa tinarifi ya himata nima yama na ta oribe?

Rabao tikoto onofi onofa amake, Hakeo tohaharo. Tika yamaba ahi oni ya tikoto ta tinahabana tike, ota famibana. E ye kahari nima oko yama ahi ni ka faha fowe nabanake. Manakobisa faha famamaki ya yama ahi ni fawa nabanake.



Rabao oko faha fowe ahabake. Hakeo ta tinahabana tike, otihabana.


Ee, amosake. Marina e hiri naba eke, tifaniba karo.

Rabao ayaka hiri ne ka ayaka ahaba ayaka nowati ya Rabao bite kahabanehimatamonaka.



Yako tika yibotebone mani wara tinahi.

Hakeo tiwa noki onofara oke, e famahabone owa.




Rabao Hakeo tikahabanarahani tike, owa ni ya. Riyanike, tikahabanaro, owa ni ya.

Yako Rabao hora nematamonaka.

Yako e yoto ka fanakabote tera amake. E fanawi taiti ta fanibate amake.

Hakeo ta ya owati forehara oke. Oko yama ahi ni nafi nofahara oke, Hakeo otihabone owa.



Hakeo ta onamaketasahabana oke. Hakeo ta oni ya yama ahi titasabana tike. Faha fowe e ye kahari nima na e ye famamaketasi ya tika yama ahi ni fawa nabana tike.

Ee, Rabao yama ahi onamaketasahabana oke, Hakeo onawanamaketasahaba owa.



Hakeo tiwa onofa oke, kasiro ya. Yama ahi otasabone oke, tika manakone onahabihatashabone owa.

Yako oko yibote tihahabana tike. Tika iti onofa oke.




Yako Hakeo ititase yama ahi tasehimatamonaka, Rabao ka yamabonehe. Hakeo manakonebone Yako ahi kaba na tohehimatamonaka. "Yako tika bani meba me ta onahabana oke, me hani kobobo na mati. Oko bani me hani watarabana oke," Rabao ati nematamonaka. Yako ka bani me ta me tototama tohehemetemoneke, me hani wata mati. Rabao ka bani me hani watara me totamarehemetemoneke. Manakobisa Rabao Yako nonofawa toharematamonaka. Yako fati hiyararawematamonaka.

Hima e tokomaba eke, okobi taboro ya. Yana ona Rabao ohiyarariba. Rabao onakomeha oke. E ka yama e hawa tonihahi.




Yama me hawa tonihawahama me tokomemetemoneke.


Rabao era nakamakehiba e amake.



Yako fati Riya tohaha biti me ta me tamehemetemoneke. Hakeo biti oharimatamonaka. Inomatamona amaka, Yose. Yako Hakeo ta nonofa tohehimatamonaka, Riya nofarari.



Yako me toka e ye kafami nima me amo ni na Rabao me me hiwasimakemetemoneke.





Yama we one ya Yako me hinamati awehimatamonaka, Teoso nanarifa mati.

Teoso nanarifa me tamatehani me amake, haha tabora karo. Teoso owa kakatome awaka

Yako kobo nakehimatamonaka, bati taboro yabore ya. Isao wati nawahematamonaka, he kakomatamonaha. Yako nanarifa me tai tohamemetemoneke, Isao me aate nabone mati, Yako ati ehene.

Te tokahabone teke, Isao taboro ya. Te awe ya te ati e ni ya ahi, Isao Yako tinofawahabone Yako ati nareka. Tikakomarebonaka.



Isao Yako wati nawahematamonaka.



Yako nanarifa Isao me me awaha me wete namehemetemoneke.

Isao me kamakike. Isao mera kakamakeka, me tamaha mati.



Yako Isao nakomehimatamonaka. Yako nanarifa mera yosehimatamonaka, me tai tohamabone mati, me hinita, Isao ni ya, Yako ati ehene. Yako bani mera ta nibehimatamonaka, Isao yawi fawa nihibonaha. Yako ka me abe ebe kanehemetemoneke.

E ka one Isao me nahabi ya e ka one me hasi nabanake.



Yako Teoso narabo nima nematamonaka, mera kasomebonaha.

Yama soki ya me yo nariwa nabemetemoneke, faha ya, me hasi nabone mati, Isao me hinahabiharabone mati. Yako me one kariwa towakosehimatamonaka, ohariari.



Isao owa kako fawa tere awaka.



Te hasi naba te awineke.
Isao tiwa nahabihiba ama?

Yama soki ya bare Teoso tohe kakehino Yako watehimatamonaka. Yako nasohimatamonaka, Yako yafa kanehibanoho. Manakobisa Yako hikawamisame hinasonehimatamonaka, bisa. Yako mono nabe Yako mono ni kawahematamonaka. "Okoma okobone. Tiwiniba onawatabana oke. Yako tihamarahabana tike. Ihayeo tihahabana tike. Tiwa onofa oke. Tiwa owakatamahabone oke," bare ati nematamonaka. Yako Teoso mono hine mono ni ehene mete tone komehimatamonaka, yaka ni sata kanehibanoho.



Yama we one ya Isao kobo nakehimatamonaka.

Niso tiwa owamatasaharo ha. Tiwa owami onofaraha tiwa owama tiwa onofine oke.

Ayo owa tikakohamone titamine nofaha tiwa owaha yayai one oke.



Yako fati yofi karawematamonaka. Biti mera yofi kana, nematamonaka, Isao ni ya.

Hakeo amake haro. Okatao amaka hari. Yose amaka.

Te tamawakeni, waha.



Isao me abe kobo nemetemoneke, yama kabani ya. Me abe kobo na Isao tokomematamonaka, taboro ya. Yako tokomabisematamonaka, bati taboro ya

Yako tikamahi, okobi taboro ya.

Tera okominahabana oke, okobi ni ya.



Yako Isao mera kobo ne tokome ma tonamematamonaka, Teoso taboro ya. Taboro inomatamona amaka, Beteo.

Hakeo Teoso taboro amaka hari. Teoso taboro efe amaka hari, Teoso owa kakatomehibona ati nerihi.

Ee, Teoso era kakatomaka. Inamatewe yoto ke watakabote neba awaka, Teoso ati ehene.



Beteo yabori ya biti nawatemetemoneke. Hakeo nanarifa ati yana nemetemoneke.

Yako inamatewe makiti tohahareka. Tika yibote inamatewe nawata ahabarake.




Yako fati ahaba kamohimatamonaka fahi.

Hakeo ahabake. Okobi kitasa ne awanite?



Yako bati me awatera Yako bati me awahabone me ati nemetemoneke.



Yako me kake me kobo nakehemetemoneke. Eboro ya, Isaki taboro ya.

Abi efe okiti taboro ama hari?


Ee, iti bote taboro amaka.



Yako bati kitamatehimatamonaka.

Abi owa amake. Tikatao ama oke. Yako ama oke.

Yako tikamatasinihi? Tikatao me nawaha tiwa awine ti?




Yako biti mera towakamehimatamonaka, Isaki ni ya, me nafi.

Abi Hakeo biti me amake haro, Yose toha, Besami toha, naka hari.

Yayai oke.

Isaki Yako hiwamatase manakobisa ahabematamonaka.
Yako biti me tamaha hinaka bani me tama, na
tohehemetemoneke.



Haha tabora ka masiri
ahabarake, bani me ihi. Bani
me te kahabanahaba teke, me
te towakaba mati, tabora
Sekehe ya. Masiri na
awineke faro.



Abi,
osawibana?

Sawirima
tinahi. Hiba,
tika yamaba
ta onahabana
oke.



Okobi
Yose
nonofaraba
nofare amaka.

Ee, era nofarari.

Yose onofi
onofara ama
oke, ha owa.



Faya Yose anoti me tokehemetemoneke.

Abi ati ehene
makari amosa tasi
okanara oke
haro, tika
makaribonehe.

Ee, makari
amosake.

Yama soki one ya Yose watamimatamonaka. Yose anoti me kobo nama Yose watari kaminematamonaka fahi.

E nafi tiriko e ahi na eke, wata ya. Tiriko tabi e yoro tokaniwama e wete na eke, oko wata ya. Oko tiriko tabi wete onaha si tonaha nokosi ya te ka tiriko tabi si tonaha foro namone oko wata ati nara oke.

Haa, Yose tiwa ota narifateraba ama tike.



Yama soki one ya Yose watamitasehimatamonaka.

Amowa me kasohamone oko wata ati nara oke, onokosi ya. Bahi sona, abariko sona, nemona oko wati ati nara oke, onokosi ya.

Yose ota nafi tiwa ota narifaba ota ama?



Yose anoti me hikakomatamonaka waha, fahi.




Yose anoti me tokomatasehemetemoneke, Sekehe ya. Yama we one ya Yako Yose toyosemakimatamonaka, anoti mera towamakehibonaha, mera kaminamehibonaha, Yako ni ya.

Hoho, kiki, kamakihari ha, wawatami.

Hima e nabowaho.



Yose anoti taiti Hobi tohe hikayawehimatamonaka.



Yose anoti me koro hinisematamonaka, hoti ya.

Yose e nahabiraba eke. Yose e ta naba eke, Isimayeo me ni ya.



Yose anoti me hitimakehimatamonaka, hoti foyahari. Yose me hitimake me hekawahematamonaka, Isimayeo me ni ya.

Ota ka nanarifa amaka hari. Te kanikabana?

Amosaka.

Barata ta onahabana oke, 200 akarama tohaharo.

Me ka nanarifa ama okere.

Tiwati watarima nahi, oko nanarifa.

Te towakamaki kabote naho.



Hobi me hiwara Yose me ta nemetemoneke. Bahi toke ya Hobi kame Yose itimebona ati ne Yose fawa ni wasimematamonaka.



Hibaka Yose tohahi?




Yose ota ta nareka.

Himata nima e ati ribe, okobi ni ya?

Hinaka makari e ketehabanake bani emene ya. Hinaka makari okobi hiwi ya okobi ati e nebanaka ahi, Okatao yama nahabihani awineke, okobi ati nebanaka.

Yose anoti me tokomawahemetemoneke, me ka abi taboro ya.



Abi makari ota wasiha ota kakamineke, yama kabani ya.

Yose ka makari amake. Yama hinabowehino awaka.

Yako ohi nematamonaka, biti tabiyo. Isimayeo Yose me towakemetemoneke, Esito ya, me ta hinehibonaha, Esito ka me ni ya.



Kiki, bare te awa ha. Amosatehino amaka. Manakone nafihiba amaka.

Okanikehibanaka.

Esito me nanarifa
ohawahabana oke waha
Teoso owa tekatomahi.

Esito ka me ka owa
Yose kanikematamona
ino amaka, Botifa. Esito
ka towisawa ka saotato
mera yoyosematamona
amaka, Botifa.



Yose ka yama
ahi ni amosi
nofa amake.

Hibaka ya kakehino
amara?



Bare amaka.
Kanaha ka
amaka.

Yose amosaka.

Botifa Yose nonofa tohehimatamonaka, kasiro
ya. Yose Botifa ka yama kakakatoma totohawa
tohehimatamonaka. Botifa ati ehene.



Botifa ka yama
nafi amosi nofa
amake, Yose
ehene waha.

Ee, Teoso hekatome
awaka, makoni ehene
amosi nofe
amaka.

Botifa fati Yose noko tonihemetemoneke. Me tabori ka me fawa tonakosi ya he aate nemetemoneke.



Yose onofamaraba ama oni.



Botifa kobo name fati wara himisematamonaka, aate hinehibanoho, Yose tamine kaminabone ohi naro.



Botifa ati ehene me hekame me hibehimatamonaka, kateya ya. Me ka owa kateya ya foye ati yana nematamonaka.



Yose kateya ya foye Teoso haha tohehimatamonaka.



Me nafi Yose ati me nonofa tohehemetemoneke. Me abe mono nabone Yose mera bari kanehimatamonaka.



Esito me ka owa Yose mera kakakatoma tohe Yose nofehimatamonaka, Yose ya famehibona Yose mera kakatomehibonaha.



Yama we one ya towisawa nanarifa me one te nemetemoneke, towisawa ati ehene, Esito ka me nafi ka towisawa. Me watamikimehemete-moneke, yama soki ya. Yose me aate nemetemoneke, me watari Yose hikaminahabone mati.



Yose himata nima Teoso ati rano, oko wata ya?

Tihabarabone tike. Tikamabone tike, yama ahi tinahabone tiwa, towisawa ka yama. Owa tikaminahabana tike, towisawa ni ya.

Oko watara, ha owa?
Towisawa tiwa nahabihibona Teoso ati nareka.



Yose ati kasawariteremona amaka. Towisawa nanarifa owa ahabe owa ta hasi nematamonaka. Hasi ne ati katamomatamonaka, Yose ni ya. Yose kaminarematamonaka, towisawa ni ya. Faha fowe famaha ahabi ya towisawa watamimatamonaka. Towisawa he nanarifa haha nematamonaka.



Owa ha tine ti?

Ee, tiwa ha onahara oke. Owatamihara oke. Hike oko wata kaminaraba?



Bare wati owahara oke, Yose tohahari. Hibati ya oko wata kaminemari amaka.

Tinakamakiho.



Towisawa nanarifa Yose tonakamakimatamonaka.

Wata tiwatomakoni me ati nine?

Wata kamini owatora awineke. Teoso ta hiwatoha awineke.

Oko wata e nara oke ahi. Bowi imarawaha watari owarawara oke. Bowi imarawara watari owarawara onahara oke. Bowi imarawara bowi imarawaha yome narawa watari owarawara oke.

Teoso ati e nareka ahi. E

ye kahari nima faha fowe na e ye famakeha ya faha fowe ni ya faha kaki nafihaba amake. Faha kaki nowati ya faha kakemarahaba amake.




E ka yamata e tonihaba eke, e fimiraba e.

Owa nanarifa tihawahabana tike. Esito me tiyoseabana tike, e ka yamata me tonihaba mati.



Towisawa ka aneo yoko tonehimatamonaka, Yose yehe ya.

Manakobisa Esito ka me tiyosewahabana tike, Esito ka me nafi. Me yoyose tihahabana tike waha. Yose yama tiwatote ama tike.



Yose ati boti ya Teoso hihiyara tohehimatamonaka.



Yose ati ehene Esito me tafe me totoniha tohehemetemoneke. Yose Esito me ka one



Faha kakeha bara tona nowati ya bara me kakerikosehemetemoneke, yamata me kanikabone mati, Esito ya. Kanaha ka me kake nemetemoneke, Esito ya.



Yose anoti me kake nemetemoneke, Esito ya, yamata me kanikabone mati.




Yose hiwa namoremamonaka, anoti me hiwatorehibonaha. Mera totomi nebona ati nematamonaka, me ati mitehibonaha.

Otara te keyeharini? Otara te mono nabone owati boti ati nara oke. Kanaha ya te tokomi ya otara te tokaminami ya Kanaha ka me kakehaba me awineke, otara me mowa naba mati.



Tera ota mono rabone otake. Ota ka ayo me hinama me ota amake, ota ka abi bote tohahi ota. Ota ka abi yamata kaniki ini hiri nareka.

Niso owa ne awa?



Ota ka niso owa tohe awaka, ota taboro ya. Efe anoti fawa nematamonaka.

Me te towakamahi, me kibibeya kateya ya.





Kofenato himata ebe nara?

E awakere.

Me amo ni ha fama ha ohari nemetemoneke, me kibe mati.



Yamata ta owahabana oke. Te wete tonamaba teke, tabora ya. Te ka owa ohari foyehibanaka, kateya ya. Te ka niso owa te kakamatasahaba teke, owehibana. Owe ya anoti fito onihebanaka.

Ha owa?



Teoso te manakone nahabi awaka, Yose e ta namaro e.

Te narabo nima onahamaro oke. Yose ni ya e ehene amosahi onahamaro oke.

Okoyo owa me wati nawaha owa awine oke, waha.

Simiyao foyehimatamonaka, kateya ya. Me one yamata kanikemetemoneke. Esito ka owa ati yana nematamonaka.



Yamata manakone te ta naba teke.

Oko yama manakoneni kafoyaro ha. Oko yama manakoneni amake. Yamata manakone onahabi ka yama manakoneni amake.

Yose anoti me yana towaha me tokomemetemoneke. Hawi ya me kakayoma me ka owa yamata katisematamonaka.

Himata Teoso ebe nara?

Himata nima e ka abi ati neba amara?


Era kakoba amaka, Simiyao foye ehene kateya ya.

E ka abi e ka niso kahabanehiba ama, e towakamehibana?



Yose nanarifa yinero me kakibiemetemoneke sako tori ya, Yose ati ehene.

Yose anoti me tokomemetemoneke. Simiyao foye me wawati nawa tosi nemetemoneke.



Me kobo tonami ya me ka abi tefebona me namohemetemoneke.

Se, oko yama manakone kafoyineni.

Oko toha, ka.



Hike eheno amara? Hibaka Simiyao toharano?

Simiyao foyahareka, Esito ka kateya ya.





Himata ebe ne foyarano?

Kofenato ati ehene Bisami ota towakami ya Simiyao fito tonehibonaka.




Yose fawa nemari ama ha, manakobisa Simiyao foyatasaha kateya ya, Besami kahabani onofa okere.


Simiyaora?



Himata nima e nawahyaribe, e tefe tofiyo ya?



Me ka abariko ahabe ya me tafe tofiyowahemetemoneke.



Himata nima e nawaharibe?

Yako biti Bisami tohe kahabani nofarematamonaka, anoti me ya tabehibonaha.

Kofenato himata ebe ne Bisami ino hiri rano?

Osawiri ya kofenato yamata ta namare ya e ahabawahaba e amake, fimi ihi. Osawiri ya kofenato Simiyao tasi toniharehibonaka.



Abi Bisami ati timitabana tike.


Ee, Bisami te towakamahi. Yama manakone sako ya te wasiha te ta niyahi faro. Yama manakone haha te towaki yotoha yamata te kanika manakone tohiyahi. Yama hinita te ta naba te kiha nahi, kofenato ni ya.



Esito ya me tokomatasehemetemoneke.

Bisami watorima tinahi. Tiwa ota kakatomahaba otake.


Owato okere.



Me kobo na kofenato ino me hiri nemetemoneke.

Ota kamatasa otake, yamata ota kanikabone ota. Ota ka yama manakone ota wasiha otake, sako tori ya, kibehanihi. Afa yama manakone ota ta nawahabone otake.

Hiba, yama te nonoki namatahi.



Simiyao afa ama ti?

Bisami tiwa awinima onofa ama oke.


Simiyao titaminini?

Te kamarabone owati boti ati nofa ama oke.

Okobi tiwa wati nawahe ati kamoni nofe amaka.



Yose anoti mera ha nawahematamonaka, me tafahabone mati, hinaka yobe toro ya.





Abi amose awa?

Ee, amosareka.



Efe niso yoto ke ama?

Ee, Bisami amaka.

Yose nisori Bisami tohe awe ati kamonimisematamonaka. Faya toke ohi ne anoti me hiwarematamonaka.

Himata ebe nara?



Me tafahabone me nahoriemetemoneke.

Hike era kaminarano?

E taiti ka faha fowe watohi awaka.



Yose ati ehene Bisami ka yamata ta tamehemetemoneke, me ta hinaharo.



Bisami ka yama tiwa ha.

Kofenato Bisami nofe awaka, kasiro ya.

Yama me kanikaminatasa me tokomawahemetemoneke. Me yana tonaha hibayata ya me totokoma na me nowati ya kaho kana ni kamakimatamonaka.



Te ma tonama fahi. Otarā yoyose ka kobo te botihani teke, kobo barata hiri ni tohaharo.

Ota botirarake. Ota ka yama ki tinahi. Yama ota botira otake.




Te ka sako ki onahabone oke. Kobo foyi owasi ya te ka owa owakamahabone oke, otara yoyose taboro ya, hinaka yama ahi nebonaha.

Yama se ne kobo foyi wasimatamonaka, Bisami ka sako ya.



Owasi oke, kobo.

Esito ka me ka owa kobo wasimatamonaka,
Bisami ka sako ya, kofenato ka kobo.



Yama wiye
e na
owatera
ama oke.

Yama botirareka.



Tikiyomahabana tike,
kaho toro ya. Tiwa
owakamahabana oke.

E nafi wete
tonamaba eke.

Yose me kami awe noko yawari
katomematamonaka, keye hiri nama nari.



Himataba oko kobo te
botirini?



Oko kobo botihino yokana sawihibanaka, oko yama ahi nebana. Te one me tokomahi.

Yose anoti Sota tohe ati yana nematamonaka.



Bisami tokomare ya okobi ahabeba amaka, yawa ihi. Bisami hiwa tokomaka. Bisami ka yama ahi onahabana oke, ha owa.

Yose nanarifa mera toyosemehimatamonaka, ati me himitarehibonaha.



Me ya otabamatabone oke.

Yose anoti me hinakomehematamonaka. Yose hiyari me mitahabone Yose me noki kanehemetemoneke.

Yose yokama ama oke. Te ka niso ama oke. Owa te ta namaro te amake. Ohabarabone Teoso owa kakatomehimari ama oke. Otamina oke, Teoso ehene.





Esito ka towisawa Yose anoti me tamine mitehimatamonaka. Yose ino hiri nematamonaka, Yose ati mitehibonaha.



Yose anoti me wete tonamatasehemetemoneke, me one me me tonakama mati.



Yose tamine yako mitehimatamonaka, biti me hikaminahari.

Yose ota awa otake. E totabamahabone Yose ati nareka, Esito ya.



Abi kaho tiwa ha,
Yose ta hinahari.

Yose ahabare awaka. Keye amara awineke.



Faya me banawehemetemoneke fahi. Hawi enoki ya Yako bani ta nematamonaka, Teoso ka banibonaha.

Yama soki ya me amo na Yako Teoso watari awehimatamonaka. "Yako tiwatorahabone tike. Esito ya tikahabone tike. Osawiabone oke, bisa," Teoso ati nematamonaka, Yako watari ati nematamonaka.



Yose biti me ka iti me noki nemetemoneke, me hiwatere me hiwehibonaha.



Yose nanarifa kamaki Yose narabo nima nematamonaka.



Yose kaho ya bete kawahematamonaka, bati mera awehibonaha.



Yose fare bati yofi kanehimatamonaka, towisawa hiwehibonaha. Towisawa tabora amosa ta nematamonaka, Yako me taboribonehe. Tabora inimetemone amake, Kosehe. Tabora masiri kihemetemoneke, bani me tafebonehe.



Yako me wini totoyabo tohehemetemoneke, Esito ya. Yako wiyowiyo nematamonaka, waha.

Yose abi kitarisarareka. Abi tiwa ati ne tikamabone tike. Tikatao me tekamahabone abi ati nareka.



Faya Yose biti mera towakamakimatamonaka, bati taboro ya.

Tikatao me tekake ahi, owa ni ya, ayata ya. Matehe tati boyo onikimibeya.



Te ka noti me tamiyahi, Teoso ati ehene.



Yako ahabe me hekematamonaka, temene itehibonaha, Kanaha ya.

Yako ahabe ahabi nowati ya Yose anoti me hinakomehatasehimatamonaka.

Manakobisa Yose yama manakone ta nebanaka, e ni ya.

Hima, e aate nabaya.



Me ka abi me kamoha me ka abi kamo
nowati ya Yose anoti me ya me taba me
kamatasehemetemoneke, Esito ya.



Esito ya e kobo tonami
ya Yose e aate naba
eke.

Ee, amosake.

Me ka owa me yosehemetemoneke, Yose aate
nebonaha.

Yose hiyara mite ohi nematamonaka.



Tiwati e nabana tike ahi. Yose
yama wati tiwahamarabana
tike, ayo me hiri hinehemete.

Okoyo me haha tinahi, me kamahaba
mati, owa ni ya.





E ka abi ahabe ya e ka abi ati e nareka ahi. Yose yama wati nawahamarayaho, aya te hiri nemete.


Owa te nakomerima nahi. Owa te nahabihabone te ati namaro te amake. Esito ya okari ya te ahabenamaro te amake.

Faya me winawehemetemoneke, Esito ya.



Tabora amosake haro. e wiwina.


Ee, Teoso amosaka e ni ya.



Yose wiyo nawahe mera ha nematamonaka, me kakehabone mati.

Teoso ati ehene te tokomaba teke, Kanaha ya. Ohabi ya te tokomi ya oko tone te towakamahaba teke, kamohabana, Kanaha ya.

Yose ahabematamonaka fahi.



Yose ahabe ahabi nowati ya Esito ka towisawa ahabi yotohimatamonaka. Esito ka towisawa ahabe ahabi nowati ya towisawa owa winawatasehimatamonaka, Yose awaterari.

Towisawa owa winatasehimonaka.

Ee, hahi towisawa Yose awatere amaka.

Era nofare awaka.
Bara me e amake.

